

## Agama benteng pertahanan jiwa - Ismail Sabri

Oleh Rafidah Mat Ruzki - April 22, 2022 @ 10:50am  
[fidahruzki@bh.com.my](mailto:fidahruzki@bh.com.my)



Perdana Menteri, Datuk Seri Ismail Sabri Yaakob

PUTRAJAYA: Kerajaan perlu bersungguh-sungguh berperanan dalam menyusun atur segala langkah dalam penggubalan dasar bagi menterjemahkan konsep kesejahteraan agar ia dapat meresap ke dalam jiwa seluruh Keluarga Malaysia, kata Datuk Seri Ismail Sabri Yaakob.

Perdana Menteri berkata, ia berikutan jika tumpuan hanya diberikan kepada pembangunan fizikal tanpa menekankan aspek spiritual, apa yang dibimbangi akan wujud kepincangan dalam usaha memperkukuhkan perpaduan negara.

Beliau berkata, agama adalah benteng pertahanan jiwa yang menjadi petunjuk dalam memelihara hubungan antara kaum.

Justeru, katanya, beliau berpandangan perbezaan agama bukan suatu halangan untuk bersatu-padu.

"Malah, Islam sendiri mengangkat nilai kebersamaan dalam kepelbagaian rumpun, bangsa dan budaya.

"Untuk menikmati kesejahteraan dalam sesebuah negara, satu mekanisme ampuh perlu dijadikan landasan," katanya ketika merasmikan Sesi Taklimat Umum dan Pelancaran Buku Keluarga Malaysia Keluarga Sejahtera, di Pusat Konvensyen Antarabangsa Putrajaya (PICC), di sini, hari ini.